

ديوان شعر

# نسائم الخروج

شعر

د. محمد سعيد القشاط



بطاقة فهرسة

حقوق الطبع محفوظة

مكتبة جزيرة الورد  
اسم الكتاب : ديوان نسائم الهروج  
المؤلف : د. محمد سعيد القشاط  
رقم الإيداع :  
الترقيم الدولي:

الطبعة الأولى ٢٠١٨



مكتبة جزيرة الورد

القاهرة : ميدان جليم خلف بنك فيصل  
ش ٢٦ يوليو من ميدان الأوبرا ت : ٠١٠٠٠٠٤٠٤٦ ٢٧٨٧٧٥٧٤

الإهداء  
إلى الأعزاء في الوطن

## ربيع الهروج

وجدت في الفيس صورة للربيع في  
الهروج نشرها أحد الشباب . والهروج تمثل  
لي شيئاً لا يوصف . فهي والحمادة الحمراء  
أجمل ما رأيت في وطني . واعز موقع الجأ  
إليه في كل ربيع . أثارت الصورة في نفسي  
ذكريات . فلها هذه القصيدة . ولنا شرها  
الشكر والتقدير .

هذا الجود ناير في الهروج	كيف الرقم في اسباط الكليم
يزهّي منو في أوهامه يلوج	ويزهي فيه من باغي ايقيم
بالنّوار متلاون حروج خف	كيف العطر لاهب النسيم
والقحوان يضّادك فلوج	البوقوعون والسلس خصيم
وفيه الحرث نواره قجوج	كلسي لرض كسيان الرقيم
كحيله بين وديانه اتموج	أوبرها يماثله ريش الظليم
قارب تاق في غارق الموج	من لبعاد في شوره سقيم
وفيه الضان مطامن نتوج	اتقول رباع لا ريت الفطيم
والديجوج في اسهابه دجوج	بالودان وجلايب الريم
ترتع فوج متفقّيه فوج	من لوكلس يتهيرع سليم

طول الدهر مالاجه غريم  
يشقُّوا القلب و العظيم  
بعد اديارهم راحت رميم  
زق اطيور جاييهم الغيم  
دج بدج ماللهازم  
صقور اللوم لَمَام اللميم  
كيف النار في القش الهشيم  
ريم بغيط يتبع فيه ريم  
والشيطان ملعون الرجيم  
ونسه تعيش في الخير النعيم

وطن العز مالاجه اعلوج  
وأهله اليوم في العالم هجوج  
هطايين ما بين النهوج  
وكيف المذيبه منهم اطنوج  
أفغان . وكوس . وبقايا بلوج  
توا يرجعوا ارجوع الخلوج  
موج يزف متفقَّيه موج  
يظَّله سيلهم يلعب دلوج  
ولن تنظاف من كل لخدوج  
ويصبح موطني عالي لبروج

\*\*\*

## إلى حسن القادري

اتصل بي بعد صعوبة . وطول الزمن الصديق حسن  
يسأل عن حالتي . وحال رفاقي . فإليه هذه القصيدة .

تنشد على حالتي يا حسن  
جزت الوطن  
ومازلت في وين تحسب الظن  
\*\*\*

تنشد على حالتي يا صديق  
وعز الرفيق  
والوطن ما بعدها لضيق ضيق  
ويا قادري نبحثوا عن طريق  
بلا غير من  
تعود ليبيبا كيف تعرف ترن  
\*\*\*

تنشد على حالتي وحال نلسي  
يا عز بلسي  
ما زلت كيف الجبال الرواسي  
صاعب على من يراوز مراسي  
ما تكن كن  
ولا نرتضي لوطننا بالخنن  
\*\*\*

تنشد ولا يوريك سو  
في حال تو  
قريب بعدها النفق يبهر الضوء  
من الشط لا عند قرعة عو  
اصقور لعن  
اللي يقلعوا السوس هللي مكن  
\*\*\*

ينشد وهو عز خوت النشايد  
احماة الردايد  
وحفاظت الود حتى بعايد  
وتستاهلوا من القصايد قصايد  
اتجي في العطن  
أمينه على جبالها والخبن  
\*\*\*

قصايد تجيكم صباح كل يوم  
بالعز دوم  
وتخطم على الوطن جملة اخطوم  
تبي الشعب من نوم نومه يقوم  
افهاكي الدمن  
قبايل زها خاطري ولمدن

## رثاء

أرسل لي أحد الأصدقاء صورة شيخ يبكي  
أمام المصرف لأنه لم يستطع أخذ راتبه . ولم  
يستطع توفير حاجيات أسرته فإليه هذه القصيدة

يبكي وبكاه كبر الغباين جري دمع هاين

وتكدير للنس خافي وباين

\*\*\*

يبكي ولا من يكفكف ادموعه ولا جـوا افطوعه

وروعه اتلاقيه من بعد روعه ولا شـي صـاين

وكل يوم يشبح اكبار المحاين

\*\*\*

اتبكي الحجر بكيته يا نوال قاعـد خيـال

امين شرعوا افوخذ رزقه حلال

وزاده تمرميد كثر العيال احفـاد وكنـاين

حال يوجع الحال قعدوا رهاين

ففي وطن طـايـح  
بين خطف والموت وإلا الطرايح  
ولا عرض صـايـن  
وحُرَّات بين العرب والطلاين

\*\*\*

تخلُّط ثــــراه  
وغاب واندثر م الخرائط غباه  
وراحت مــــداين  
واقصور ما كان معاد كاين

\*\*\*

وحقــــد الــــدموس  
اللي جهلهم في الجباهي حبوس

يبكي على أولاد راحوا ذوايح

ويندب على الحال والريق شايح

يبكي على وطن يبكي اعماه

ولا حد في الكون يسمع انداه

يبكي وبغاه حكم المجوس

وكبـر الغـناين  
ولا ينفـعوا شـيء كيف البـطـاين

والدينهم كان سرقة افلوس

\*\*\*

هو رمـز عـار  
للي يسمّوه لنـذال فـورار  
يزيلـوا المشـائين  
اصقور يرجعوا حاميين الدماين

هالشـيخ حطـوه في كل دار

وسيورهم ينشلوا الوطن لابر

\*\*\*

عدو ما يـروف  
وبكاه في الوطن صرنا ضيوف  
بعد صار مديون من بعد داين

بكاه غلبة قحوف القحوف

ووطنه قعد فيه كان  
الصـه ف  
وما هوش هـاين

\*\*\*

## رد على رد

أرسل لي الشيخ بيتًا يقول فيه

اصبر وروم العكس ديره جارك  
والهلس ما يبرد امّاجع نارك

\*\*\*

الرد :-

صبرنا وصبر الصابرين صبرنا  
ورومة طريق العكس ما تجبرنا  
ما نروم عكايس  
في عصر متكاييس غلب من سايس  
ومهما علينا هلسات هسايس  
يا شيخ عل هلس الهلاس أكبرنا  
وما دام وطنك في حميسة حايس  
زعزاع خيمتنا كسر جابرنا  
غريق موج غليني غلب من قايس  
على العكس ومرار المرار جبرنا  
وما دام شعبك في المدنّه بايس  
مانيسوا يبقّى بعيد نظرنا

\*\*\*

ما نتهنوا

ولا من فرج من غيرنا نستنوا  
احنا ما اقدرنا من زمان انونوا  
وفي البير خان أحبالنا حادرنا  
ويا شيخ كنا في القريب انظنوا  
فيسع تندا من السقف قاطرنا  
وقد اش في اقصور الرمال انبنوا  
شلوق غرب دمرها كما دمرنا  
سنين طايله بمجد القديم انغنوا  
ظهر فسرى في الغابرين خبرنا  
فيه من نصحنا نخمدوا وانكنوا  
خايف علينا الموت كان ظهرنا  
وفيه من نصحنا للسلاح انسُنوا  
ولا يدوم وقت الغدر من غادرنا  
وليام للي قافيه يتعنوا  
شوف من يقود بجحفته قادرنا

\*\*\*

## ليلة العيد

علي هايضه لفكار ليلة عيد  
فكل شبير في عرض لبلاد شهيد  
على هايضه لفكار ليلة قدر  
وجايت شرايط ماليه بالكدر  
في ابلاد كانت واسطة في الصدر  
اليوم لا علم لا شعب لا ناشيد  
وراح مالها بين المخائب هدر  
وراح عرضها امشلتت بعيد بعيد  
وذبلت كما يذبل اهلل البدر  
ولعاد للها في العقول رصيد  
ومكتوب ما ينفع اعماه الحذر  
رمى ارفاقتا في الضيق والتشديد  
ستين قمرة والكدر لا يذر  
الشيخ العبيدي وصاحبه بوزيد  
نزيرة عرب مشين اثراه الندر  
معاه الزوي وزيد ولد الصيد  
ومنصور بين المنحدر والحدرد  
كما الصقر طايب مركزه على ليد

الحيطوم بن نايل خذوه بغدر  
رفيق الصحاري الكالحة والبيد  
وكم فارس المدعك مشي في الودر  
لا غسل لا كفآن لا تشهيد  
وشي عم لأصحاب الوبر والمدر  
كيف النخل في العامات تميد  
وصاب لطراف الحاركات الخدر  
شعب بأكلمه خايف من التهديد  
يرحم الفرسان مدعك بدر  
اللي ضربهم في الحرب بالتكميد  
جلوا على الخاطر غصايص كدر  
واجندوا سربه بلا تجنيد  
وجت (ناديه) للنار تهدر هدر  
خذت ثار للي ثايرين ابليد  
واش للرجال الراجله من عذر  
منين الحراير للصهيد صهيد

\*\*\*

افكار جاييه لوهام  
وهي في الدرك والكدر خامس عام  
بدي شعبها في امواكره موظام  
اللي قبل في العيد السعيد سعيد  
الوف تالفه بين الشتات ايتام  
والاف ربطوا قايمات غريد  
وفي الحبس خيرا رجالها موظام  
اللي قبل ع اللي رايزين يكيد  
اتدوري كما لفلاك ياليام  
وكم صقر في المركز يموت جبيد  
وكم فحل راد عرسه دام  
وكم ذيب بالغدره كلاه الغيد<sup>(١)</sup>  
وكم صقر ما كمل أيام صيام  
رماه دهر كسرله الجناح رييد  
وحررات بين الظلم والظلام  
والشعب كنه رم في لرمام  
بين الكدر والدمع والتهيد  
لا ثار كيف التأثيرين وقام  
وكسر على وطنه حديد القيد

(١) الغيد: الجدي . صغير الماعز .

وجي كيف سيل الجور من لا كام  
الموت منه لا صمم عليه تحيد  
وليام كانا قصرنا ليام  
موحال ذل الذالين يفيد  
وجفوا بعد ضم الورق لقلام  
وحق النبي يا عيد مانك عيد

\*\*\*

## الصوم على الوطن

الصوم صوم والصوم الكبير اصيامك  
على وطن فيه ايهنتشوا قدامك  
صوم فريضة

تتحمله افحر المصيف وقيضه  
وصوم اللي يخلي في النفوس مريضه  
على وطن حيرلك لذيد منامك  
عدوك يزيّد البغض في تحريضه  
ويقطع طرايق شادات اسلامك  
إلا الدين ما تقدر على تعويضه  
اجدود قبل كانوا رافعين علامك  
صوم الصايم

في دين ما خلوا سفينة عايم  
وصومك على وطن لعزاز جهائم  
ما جاب لوم الاليمين ملامك  
اتلايم وما خلوك كيف اتلايم  
اتنور وهم زايد ين ظلامك  
ومتخلطة فيها مشوم وشايم

اللي تبنتيها يقطعوا في ارمامك  
اشيوخ جهل مال المسلمين غنايم  
يفتوا فتاوي كاذبه قدامك  
لاش اتصيموا  
من الجوع كيف السايحات اتسيموا  
والوطن يزابوا على تهديموا  
وكل يوم يفنى الشادين احزامك  
وين حر قاضيهم على تهديموا  
وترضى القضي في اللي قريب ادمامك  
بلا اجهاد فرض الفرض يرقى غيمو  
ايحرر من أوهام لوهام اوهامك  
\*\*\*

## سرير التميمي

سرير التميمي وقارة البرّاني  
دون من شغلني ولا تركني هاني

\*\*\*

ماتا منهم  
رقاقات كيف البحر ياما منهم  
تكالى العدو عنا زوانا عنهم  
وصرم علينا غزلها المتقاني  
زعزاع هالغرب الشلوق مكنهم  
يريد ثار بيخلص نهار الهاني  
معطشات افجوجه  
سرير شين غير الصابرين اتلوجه  
عليه غصب خطفتنا ثنايا عوجه  
خان البعيد وخان خوك الداني  
واللي ركب مغرور ظهر الموجه  
اليوم صار ذنبه كيف ذنب الكاني<sup>(١)</sup>

\*\*\*

---

(١) الكاني: هو الكلب باللغة الإيطالية .

افجوج ايشفوا  
فيها القبالي الكالحات ينقوا  
ريشات قلب الواكدين يرقوا  
إن خشوا سرير القرظبة المداني  
قورات في مثل القدور تكفوا  
حم سود في بحر السراب مثاني

\*\*\*

جي دون من شغلونا  
مزازات دون اعزازنا بعدونا  
خيان خلوا طرابلس للهونا  
اخبثا نفس باعوا دينهم بالفاني  
هالتاويرح النصر يبرم عونه  
اتعود كيف ما كادت اعزاز ادماني  
هالتاويرم ريحه  
ويشفي عثار الوطن بعد الطيحه  
يجيه سيل بعد الفجر في التصبيحة  
يكر كل ما داروا حمير مداني  
يعود وطن لا هل الوطن بعد الريحه  
من البومبا . الياعات في فزاني

\*\*\*

هالتا وتعدل ميله  
ويطغى على هاكي لسهاب قصيله  
وتصبح هنايا بين يوم وليله  
حفافات في المربع ابوت امباني  
وكل من عطانا كيل ياخذ كيله  
عليه ينطوي الدوني على لقصاني

\*\*\*

## الصبر

صبرنا وصبر الصابرين اصباره  
على الحنظلي زايد عليه مراره  
زخيم مذاقه

أمر من مرار المر في دريائه  
لا أرفاق تطاول أعماك رفاقه  
خنائيس تحت الطاولة تداره  
ولا من يطول للعليق علاقه  
ولا من يغيث المنكسر بجباره  
ولا منو ينقذ من غريق غرقه  
ولا من يعين الضاله بدياره  
اللى توجعك لحظة إفراق افراقه  
يرتاح لاحط الصديق ايساره  
حوالات حال احسابها مالاقه  
ترفع وترمي حرفة القماره  
ترقّل الثابت من متين أوثاقه  
وتترك احبال الوقت ع الماكاره  
حوال تتركك تنحز كما الطرطاقه  
عرجونها من عام راح اثماره

\*\*\*

صبر الصابر  
صبرناه وتقطع اطناب الجابر  
اتكابر وما تقدر اتزيد اتكابر  
وما تنتقص للكاشرين كباره  
وتخرج على السابر تعيد السابر  
الحر حر تبقى امقونات اسباره  
وتجبد سرايب للزمان الغابر  
وتذكر من التاريخ للعبّاره  
او تلقى منابر ماحيات منابر  
الى جد يمحي للقديم مساره  
ويكتب يجدد للجديد محابر  
ويبنى على سور القديم اسواره  
وبالجهد في الشور السقيم اثناير  
وتغفل على شورا لخطا ماتاره  
أيام يعبروا كيف الكريد العابر  
قليل النجا من جاه في تياره  
ايناله كما نول اطيح الوابر  
وانشد على طول النخل وبّاره  
وليام تنقص كيف شبر الشابر  
وتزيد كيف اشبار للشبّاره  
الدنيا مناظر والرجال مخابر  
والكرم يظهر قيمة الكمّاره

والجهل دابر في البلاد منابر  
والليط فوق من الذهب معياره  
عليك القرايب في عدوك اتخابر  
والجار مايا من مخازى جاره  
الدابر يجد جديد ينسى دابر  
ومن دبّره يعزف على القيثارة  
ولا من تعبّر بالزمان العابر  
وراجع عدوّه كيف دار مداره  
وليّام تفعل فعل كيف الزابر  
لزيتونها تقطّع اعراف خضاره  
ومن طاح ما يلقي رحيم القابر  
ووين يلتفت ما يرحموه انصاره  
واللى على جمر الجحيم صوابر  
مش كيف هلى اشفقة البحاره

\*\*\*

## اجراح جارحه

أجراح جارحة لجراح في مكنوني  
وعيبة اصباغي راخشات اعيوني

\*\*\*

اجراح جدايد  
كل يوم يقبضها النزيف بزاي  
ظهر حبل وارد بيه نصفه بايد  
تقطع املو الدلو مارووني  
ويا ريت من حط لقراب بعاید  
يظل في (كمنجارو) القريب الدوني  
وريت بينا والعافنين حدايد  
ومقطوع مسداهم اعماي اثموني  
أنت اترید والمولى الكريم الرايد  
وخابت مع اللى خايبين اذنوني  
اجروح شطايط  
متوسعة صعبة على اللى خايط  
بين الحنايا ما تطول ربايط  
وعل من يعالج بالصحيح قصوني  
اللى كيلهم كيل العفانة شايط

بعد فقت ناظور الحدايد روني  
اعمار وطن ولؤلؤك احتال لقايط  
شراهم الشاري أبيارتين اكروني  
عداوات ظهرت صابغات حنايط  
من بالبو وأيام مسكرسوني  
ولعاد للنوم اللذيذ غفايط  
سطير الجوارح ع المنام قسوني  
وتظهر خرايط لاغيات خرايط  
رامي عليها العين برلسكوني  
والشعب عاميه الجهالة زايط  
خلو وطنهم معاش مصيوني  
الناتو ترك في الوطن غير سقايط  
واش يطلب القازن من القزوني

\*\*\*

## أنور محسن زهيو

سقط في ساحة الجهاد فارس من فرسان الوطن وبطل من أبطال التاريخ . إنه المجاهد أنور محسن زهيو هذا البطل / الذي خاض المعارك . ولم يستسلم . ولم ييأس ولم يتراخي في كل مناطق الغرب التي خاض معاركها ووالده محسن زهيو الرجل الذي قدم كل أولاده للدفاع عن الوطن فإلى أخي محسن زهيو هذه الأبيات وهي أقل ما يستحقه أنور من عمه . وأنا الذي فقدته أكثر من الجميع .

نارك اللى شاطت وزاد حطبها

ما نعذك ولآعها قربها

منها الصهيد الحقنا

وكيف ما انحرقتوا لهبها حارقنا

على صقريا محسن زرم فارقتنا

جناحه تكسر والزمان نكبنا

كسار للعادي نهار شرقنا

فراج للغصره نهار عطبها

منين طاح في ميم العيون عرقنا

اقلال من القينا شادين نشبها

فارس نشلنا من غريق غرقنا

وأنور بحر صه ما ترك مركبها

نتقت ونتقها على منتقنا

غلبت الدولة وما رضى بغلبها  
وظهر من الشرق الشفيق شفقتنا  
بهر فجر راجيناه من مغربها  
ما توجعكش الموته  
ولا فارس المدعك سقط من كوته  
والبطل يقعد حى بالمتبوتة  
وكان للشهادة الشاهده راغبها  
سرجه قعد والبندقه وابشوته  
تغرد على اللى بعنتره كسبها  
وقعدت نصايب مشهده منعوته  
سجل فخر يقرأ افخارها قاريها  
وربك يبارك في بقية خوته  
حاطين مرسنها على غاربها  
التاريخ ما هو برادته ومروته  
يسجل لهم لمجاد وين كتبها  
عز عمهم والوطن عز منوته  
هم السنايد وين ما نطلبها  
انقاني مساده بغزلها مفلوته  
وفرسانها الصيعان يا طالبا

\*\*\*

## الصقر العنيد

الصقر لا زال ناوي المراكيز  
على قنة انقيص وأوهام داره  
يقيس المسافات قيس التمايز  
ورامي ورا شور برقة انظاره  
وجي حايزه البعد شور المعازيز  
وين دارجوا في النقاظي اصغاره  
ووين يشره الذود بيه المحازيز  
يقطف افنوار غيث الجفاره  
وتورد مناهل سمت بالغراغير  
على بير مشهور طاييل امجاره  
ما تترك الوطن لولي المهاميز  
غاروا مع من امعادي مغاره  
وما فرزوا شور صايب بنفريز  
بلا عرف ذهبت عليهم اشواره  
وللوطن خلوا الكدر والتناحيز  
خلا وطن بالسو كثر ت اكداره

\*\*\*

## إلى أخي الذئب

الذئب الذي وجدته حرًا طليقًا في صحراء الجزائر . ووجدته  
حرًا في صحراء مصر . دارت الأيام . فوجدته في حديقة  
الحيوانات مسجونًا في قفص بتفرج العامة عليه فألى أخي  
الذئب هذه القصيدة .

يا ذيب شدوك شدوك	ما في الليالي عقيدة
وليام يا ذيب خانوك	افوسع الصحاري الهيميد
نصبوا الشراريك ورموك	في قفص عالي حديد
ولصحاب اللسو خلوك	وما هي عليهم جديد
اللى قبل بالفم يفدوك	ما يجوك من غير فيده
تعوى سراريع ياتوك	مشوا كيف نار الحصيد
يا ذيب لشرار هانوك	الحر من يهونه مكيد
بين الشبابيك حطوك	وحبّس تاكل امنيد
ويتمتعوا ببيك داروك	منظر الميّت جبيده
كنت ملك واليوم مملوك	وكل سرب وانت قليده
وكم عشت من يوم سردوك	وتّوه دجاجه كسيد

الراعي امقطّع ريدده  
اتغير ما عليكش مكيدده  
ومن مامنك جاك كيدده  
مغفول شدك قنيده  
مشيت كيف عود الوقيدده  
بعيد منزلة ما تريده

مجاريح طحنا ثريده  
ومطحون كيف السميدده  
اللى ما عليهم نقيده  
في النار طايب حديده  
ضميده اتساند ضميده  
من غايره والقعيدده

ومعاد في الفج ناروك  
وترقب القورات هاذوك  
اطمنت في دهر مشكوك  
ض ، قتل حبل بالسو محبوبك  
ويا ذيب عدواك دالوك  
الحقنا منلشيب وجعوك

وكيفك حفايا على الشوك  
غدا الشعب هالك ومهلوك  
نصبوا لنا افخاخ واشبوك  
وداروا لنا نصب مسبوك  
عربان . والروم . واتروك  
ولاخوك دير على بوك

وصبّت أمّاجع عيـده  
وغلس الكتب في الرفيده  
الحبّلس يصبح افقيده  
ما يفرّط عبيده  
والكون بيدين سيده  
حر في لفجوج البعيده  
والبارده والسـميده  
كيف الحمامه الفريده  
ابصيده الماهي مصيده  
قصيده تعقب قصيده  
تروم للمنحس صهيده  
ونغلو الشعوب العيـده  
ونشفو لهموم الشديده  
منين شعبنا يعود عيده

ما يوجعك حال واحلوك  
وليام لا كان لحقوك  
سيورها اتدور لفلوك  
وكيس المظالم مشروك  
اللى يحوك معاش يحوك  
وسيور يا ذيب نلقوك  
تنجال ما بين شكشوك  
في وطن حامي ونحموك  
واياك يا ذيب بغروك  
ويا ذيب تسمع وأنا خوك  
على اصقور ماهيش بيدوك  
وفي وطن غالي ونغلوك  
ونشفوا الغلايل ونشفوك  
ونتبادلوا فيه مبروك

## يا بن شعير

إلى الشاعر الكبير : الصحبي شعير  
الحمروني . أرسل إليه هذا الملحق  
لقصيدي بعنوان :

سلامي على ارجال الجنوب النادر

اللي يشفهم في طرابلس ما صاير

واتأسف لعدم ذكر مجموعة من قبائل  
الجنوب التي كان لها دور مميز في  
جهاد الليبيين ضد إيطاليا ومن ضمنها  
قبيلته الحمارنه . أعذر له . ويجب أن  
يجد لي العذر فسبحان الذي لا ينسى ولا  
يسهى .

يا بن شعير اعذرني

مجروح من جار القريب غدرتي

الحمرون ع اللي امطينين نصرني

غير سهو ما ينقص على مقداره

والودرني في المعركة جاورني

منصور فيه الجابت الجباره

وزيد الشهيد من النذير نذرني

كبير شان ضيف نهار الغاره

مثاليث في تاريخهم فكرني

على بن خليفة وترعته ومزاره

ويا بن شعير احذاك لا تبهرني

السامور يقوى لابهرت اجماره  
القائد السبسي من الريب كسرنى  
وفي اكتافنا غادر طفى سيجاره  
وفعل الغنائيش لكبار قهرنى  
غنوشكم ظاهر عميل نصاره  
أولاد بورقيبه يخدموا بالكرنى  
مع قطر بن شمعون بين عاره  
وشي صار عل هذا الكلام جبرنى  
عميل جيشكم خلاه بن عماره  
ولولى الجنوب الخوت ما حيرنى  
الجيش والقيادة ينشروا بالباره  
وتاريخهم ما ينشبح خبرنى  
اسود سواد اسود كما الحداره  
ولومي على أبطال الجنوب جمرنى  
الجار ركنهم ترقى صهايد ناره  
ومن بابهم شر الكلاب دغرنى  
عجب قطر ولو اكلايهم دغاره  
كعلول جابوه لعدا صادرنى  
خش ذودنا يهدر بلا هداره  
ويا بن شعير سكاتكم كدرنى

وقرطاج فيها يلعبوا القماره  
ويا صاحبي بالله لا تجهرنني  
للجم راني وفايضه المرارة  
وبلغ سلامي لكل من ينظرني  
بعين الخوايه في الجنوب ادياره

## يا بيض الشعاف

وطنك خاب يا بيض الشعاف	ونلسه صار مكثرهم اخياب
والقمرور قبل النور صاف	والقحوان من جور لجداب
والزفزاف بيه الريح زاف	وصار اخضاب مرباعك تراب
اسنين اقصاص تتقاطر اقصاص	عليها غاب مبجول السحاب
اتراجي فيه واترايف ارياف	ماجي الققل وامطول غياب
امزانه اتوق في غرب الرفاف	غر اتقول صفحات لكتاب
فيها ابروق تتخافق اخفاف	اتقول اصغار تلعب بالشهاب
عقب الليل مداكم انشاف	وثاني غم عل روس الشعاب
وسيله دار في العالي اجراف	ومنه الصدر فوق الروس غاب
وسوى الواطيه بعلو لشراف	من غزر الشراب
يغيث الوطن من بعد التلاف	وتزهى فيه ياعوج الرقاب
ويبدا حاف متفقيه حاف	بيوت العز تتشابك اطناب
لباسين لفخار لاملاف	وردادين من شور الذهب

وروامين من رام لعياف      وطبايين من عاف الطياب  
يعودوا ارفاف من كانوا ارفاف      ويبقوا اطناب من كانوا اطناب  
ويزهى وطن بيه السو طاف      ويمخض شكوته بعد الرواب  
يعود لمركزه بعد لهياف      ويعمر موكره بعد الخراب  
ويبقى الكاف للرواز كاف      وللمغرور يجلي السراب

\*\*\*

### حكومة فيشي

مصيرك امظلم يا حكومة فيشي  
إن كانك اتظني الشعب ما يدريشي

\*\*\*

ياا وجوه الخونه  
يا بايعين الدين بالمكرونة  
خيان منزلكم اديار الهونه  
تركتوا فخار الوطن في التهميش  
عصابة اخيانه دايمه ملعونه  
رماكم عدو لسلام للترييشي

## اليوم فيه عرصات الحديد اليانت

**وحدت عليه احمول فوق مطاقه**

## وفارق اعزازہ فی سریر (اُوہانت)

## حال بينهم كيف المحيط رقاہ اھتزت

## اهتزهز ورساوی الشدايد خانة

**بدی ماه ما يلحق بغير الحاقه**

## اسرارہ الہی کانت اسنین انصانت

## صعيه على الدوار والفهقه

## اليوم كيف ما بان المخبّي بانّت

غصبا بلا راده على الرداقه

\*\*\*

## كان خفوة

سريـر من أسرار  
المخلوقه

## اتغيب في حجاها وتزرق المزروقه

وهو بأمر ربي ساعته دقاقه

## وامنین فی اوکار الغلیا شوقه

## وزادت لها ذوكه لخشوم اشواقه

بدت جلّهته بالكادره مصفوقه  
انحل عود باريها كما الطرطاقه  
رزين وطن بهومومه تكس فوقه  
وفوق قدرته ناخت عليه امشاقه  
ستين قمره ضايقات اخلوقة  
وهو قبل كانت واسعات اخلاقه  
وكم مزن غبطه في عصيف ابروقه  
ايجه ما تفاهق في السرير نقاقه  
ولا واد غصّت بالغدير اخلوقة  
ايجي فوق علو العاليات ادفاقه  
جار جاير الغربي الغنيف شلوقة  
خلى الزروع الصايبه صلياقه

وفي الجهل خلى الجاهلين غروقه  
وسكر عليهم ما ترك نفاقه  
ونار في مرابيع العرب مطلوقه  
رماهم كما الباراة في الشقاقه  
وما دام حظ افليبيّا خازوقه  
ما تلوم وجه الخافقات حماقه  
وجدبوا الهتايّا منين فاح نشوقه  
وغابت على ومالها النفاقه  
وما تلوم قلب الحر يوجع طوقه  
منين لحساب لحسبته مالاقيه

\*\*\*

## هذه القصيدة

هذا القصيدة أرسلتها للزنتان أيام أحداث ٢٠١١ مع  
امين المؤتمر الشعبي المرحوم الناجح . ادعوهم  
للانضمام إلى صف الوطن وقلت بدايتها . «إلى  
اخوتنا الزنتان مع فائق التقدير والمحبة» .

يا عزاز ماهكه لعزاز يديروا

سلّوم للي كارهين يصيروا

\*\*\*

يا حمالة الجيره

ويا سراع عند النده في التدييره

ويا خوتنا والخوت كيف الصيره

إن طاح ركنها للباتيين يحيروا

رانا بلاكم كيف خيط النيره

بلاسدو ما يلقي المسدي خيرو

رميتوا علينا كاف تدميره

ورا هو كثير الخوف من تحديرو

يصير كسر ما ينفع معاه جبيره  
غوير العداوه يشغلك تظهيرو  
وكنّا وكنّاكم ارفاق مسيره  
الكل من تكولف نفعلوا وانديرو  
هالتّاو لانا مشوره لاشيره  
وبرنوس همتنا انشرك تصديرو  
دهمتوا غواغي الكاف ومحاذيره  
ونفخو لكم باب العداوه كيرو  
يقضوا مصالحهم اخباث السيره  
ووين يربحوا يعطوا عربكم تيرو

\*\*\*

يا عزاز عربنا  
ويا سيوفنا في العرك كان ضربنا

راهو نشبكم غلس في غاربنا  
كانكم دريتوا للخوايه عيروا  
وخوفة انواجهكم اشهور هربنا  
اعلاج غيركم مايوم فيه انحيروا  
وصل سيلكم راقى على شاربنا  
وحبل التبري -ولو طال- قصيروا  
فرق شور مسربكم على مسربنا  
وولوا علينا القاصرين يغيروا  
اللى يعرفوا و كان اركبنا  
انخلوا مزازات الحفافة جيروا

\*\*\*

غير شااوروا عقلاكم  
ولا تغتروا بالغاترين ادماكم

جفيتوا ومانا طايقين جفاكم  
النّافر يباعد على سبب تنفيرو  
ورمتوا روافض طاعنين قفاكم  
الى حسابهم يظهر عقابه زيرو  
احنا ستاركم وظلالكم ودفاكم  
احنا سدكم للهاربين انجيروا  
والصّف ما يرد الصفوف بلاكم  
سور بني فلّتكم قعد هنشيرو  
غير ارجعوا وعودوا على مبداكم  
كبير لصل ما يهرب يفوت قميرو  
ولا زال في خاطر ادمان غلاكم  
المعقول ما يرمي الحجر في بيرو

طرابلس / ٦ / ٤ / ٢٠١١

## صحراء الوطن

تمتد صحراء ليبيا على مسافات شاسعة مليئة  
بالجبال والقور . والتلال والهضاب والذي يقطعها  
عليه يجازف بحياته لانقطاع المياه بها . وغياهب  
الطرق .

قورات كيف لقدور المكافي ——— راهم الســــــــافي  
هم دون واقصى اقصاهم أولافي

\*\*\*

قورات كيف لقدور لغنوج اوســــــــاع النهــــــــوج  
سراب دونهم كيف بحرنا ايموج  
ولا يقصهم زول ذاهب يلوج فــــــــفي فــــــــج حــــــــافي  
يبانوا على البعد كيف المشافي  
قورات في فج يرهج سرايه اــــــــــــــــداير ضــــــــبابه  
نازح على قاطعينا شرايه  
وموحش على من يقصه مهابه اــــــــــــــــيوحه خــــــــــــــــوافي

قورات من وسط لقواز تاقوا اسوادوا ازراقوا  
اتبان روسهم وين بعدوا تلاقوا  
ومن صهد نار القبالي احراقوا سواد الرضا في  
حقن ظلهم تحت ظل لحقاف

\*\*\*

قورات يتماوجوا في السراب اقلال الشراب  
اللى شقهم شق شور الذهاب  
ضدضاح ياما قصف من ارقاب للغيث جافي  
سنين ما رقص فيه سيل لعذاف

\*\*\*

قورات جوا دونكم يا اعزاز بعاد النفاز  
سراب يغرقوا فيه كيف القزاز



قورات يا شيخ كيف الطناجر	قطعهم امهم ااجر
ما دام وطنك امغطيه فاجر	على الدين والوطن ما هو امتاجر
قورات يا شيخ دون قصر دله	ربيبة الرفاف
وزررك رموا سوسهم في احلله	الى بين صفوا لمنادر كرافى
قورات يا شيخ جوا في الصداره	حجهم تعلقى
دون وطن يا شيخ ضاعت احارره	وفيهم تخوليط ستين مله
	ولا ممن يكافى
	وزادوا تفرقيع جلد لقرافى
	قاراه وقاراه
	وضدضاح ما تقطعش المهاره
	باين وخافى
	وضاعت مشت رقعه في السفاف

هالقور يا شيخ تبغى عزاييم  
عرب سيف قايم  
يردوا اللي نافر الوطن رايم  
ربيّة عصر لاوين العمائم  
يهدّوا اللي جايهم في الصداق  
امّـس وحاافي

\*\*\*

هالقور ما يقصهم كان دامي  
للـوطن ظـامي  
ومن كره لنذال سكران عامي  
في زحف كيف طامي الموج طامي  
وأهـل اللفـافي  
يرجع لهم دين داروه وافي  
هالقور هالي تعادوا ادكانوا  
احرار قبل كانوا  
ونساتهم يحكموا البر (كانو)



(يا ليبيا)

ترابك وريح الزعفران وريحك  
يحيي النفوس الغايات وشيدك  
سميح اطرافك  
عرفناك وانتى دافيات ارفافك  
سدرك وبطومك مع صفصافك  
وطلحك وعرعارك لذيد جبيدك  
انتى غاليه تغلي على من شافك  
وكاثر على غث لغياث مليدك  
وكم كلسيه عريان تحت الحافك  
سقيتيه من غالي لذيد ذريدك  
اليوم صاف قبل الصايفات اصيافك  
خذوك غدر وتتابوا على تمبيدك  
وكانت عليهم عاليات اشرافك  
وقلسي على اللي قايسين صفيدك  
امطرّف على مطريفهم مندافك  
وترجى لهم ثورة بعد تطبيدك  
يعود نور في مارس زهر زفزافك

سليمة وكايس بعد من تكسيدك  
تراب نشوقه  
كما المسك والعنبر يفوح طلوقه  
وكنتي حصينه امحصنه مطقوقه  
لن فاز بالفايز عليك قبيدك  
وخلاك كيف الحاقه محقوقه  
وفوق من ابدود المردفه تلويدك  
وهالتاوا يا طوقه قريب التوقه  
امزان غر يغبط سيلهم تصبيدك  
ايبات كيف نار الذاهبين ابروقه  
اتلقط عليه الناصري في سيدك  
ارعود كيف طبل الفازعين نقوقه  
فوق العلاوي العاليات نضيدك  
ايحي سيلها فوق العذايف فوقه  
امغلغل وهمه وفزعتة ترييدك  
ووديان تشرَّم ملايا روقه  
يا خاينه عهد الوفاء يا ويدك  
وتنظاف ما تقعد عليك لقوقه  
ما يلايموا في انطاحهم تنطيدك

وراس راس من بيه لخلق طهوقه  
غصيا على اللى شامته تربيدك  
وتبدأ الهدوقه عايدات اهدوقه  
وينزاح من يبغي زمان يزيحك

\*\*\*

إلى سيدي رسول الله  
صلى عليه وسلم

غيث امتك ضاعت مشت مالا  
تقطع اوكاها يا رسول  
مشت باكملها  
تكسر بفعل الفاعله محملها  
وكرت وما لاقت اعلاج اعلاها  
طاح بدها ومعاد للهاجاه  
ضاعت كما ضاعت اسنين اقبلها  
وكل يوم سفهاها اتزيد سفاه  
ترايت عليها من جميع امثلها  
وضاعت وضاع الوطن كان غلاه  
اليوم يا رسول بان خللها  
تخلط بفعل الفاعلين ثراه  
وزازت كما زازوا الطيور محلها  
وفي كل شيره شعبها تلقاه  
ويا سيدنا بجاهك اتفك ذللها  
رجاجيلها ولت اشباه اشباه  
\*\*\*

غَيْثُ أَمْتِكَ يَا سَيِّدَ  
بِجَاهِكَ وَجَاهِ الصَّالِحِينَ تَعْبِيدُ  
لَهَا مَجْدٌ وَلَى هَالِزْمَانٍ بَعِيدُ  
وَلَا دِينَ خَلِيتَهُ قَوِي تَلْقَاهُ  
تَمَزَّقَ مَشِي مَا هَوْشَ كَيْفَ تَرِيدُ  
يَا سَيِّدَ جَهْلُ الْجَاهِلَةِ غَبَاهُ  
طَوَايِفُ مَشَتْ لِلْغَالِبِينَ عَبِيدُ  
الْقُرْآنُ يَفْتَوُوا الْفَاتِيينَ بِلَاهُ  
ابْجَاهُكَ وَجَاهُكَ مَا عَلِيْهَشْ كِيدُ  
عِنْدَكَ مَعَ مَوْلَى لِمَالِي جَاهُ  
رَاهِي ثَنَائَاتَا بِلَا تَعْبِيدُ  
وَالرَّكْبُ يَا سَيِّدِي تَقْطَعُ تَاهُ  
يَا صَيِّدُ تَحْمِي تَرَعَتَكَ يَا صَيِّدُ  
اِقْدَالُكَ بِدَبْيُونِ الْجَرَادِ كَلَاهُ  
بَاعُوهُ بِالْجُمْلَةِ بِلَا تَحْدِيدُ  
وَهَذَاكَ مَرَعَى وَالتَّرَابُ غَطَاهُ

\*\*\*

## وما أدراك ما الغدر

حدثني الكثير من الأصدقاء عن أقرباء لهم ركبوا  
موجة الغدر . وظنوا أن الزمان لا يدور . ولم يكن  
بعض أقربائي بمعزل عن محيطهم . فإلى ذلك  
القريب . هذه القصيدة .

أنت دُرت تسحاب الزمان يطوّل  
في دورته ويدوم ما يتحوّل  
ريت الزمان الدّائر  
اعماه درت وادت في الديار اتخاير  
جيت خيط بين الحافه والنّاير  
وانت سبب مسدي ارتجل من لؤل  
القيتك مع غاير زمانك غاير  
وكيف ما يريدوا الغايرين اتعوّل  
وحملت لقرايب ادماك عجائير  
بديت كدر اللهم للدراه اتموّل  
وما درت للكسر الهشيم جباير  
منين زند كتفك من مكانه حوّل  
تسحاب بتطير مع اللى طاير  
وتسحاب بتتوّل مع اللى اينوّل  
ولاك شيء في اللى صار واللى صاير

وبيك شلش عقلك في زمان امدول  
الباير يجاور ترعته للباير  
وكل ما يقولوا لك اتجي تنقول  
عليك كل ما ماير عليهم ماير  
من الجهل عل وجهه العتود ايبول  
كم دايرين مثلك  
وكم من احثال امحله في جيلك  
كيف بيردوا هالتاو بيرد حيلك  
وترجع هميمه لمنزلك عمول  
ويرجع مقيلك وين كان مقيلك  
وكيف الذهبية الضالة تضول  
اتصر كيف صران الثعالب ذيلك  
وتخنس وكيف او ايلك تسول  
وقطعت في شيل لحميل حميلك  
رقيق عزم عقلك في السبيب امطول  
وليام ما تعدل حوايا ميلك  
والدهر يا مطمأن له يتغول  
ويرموك في العثرة جراري خيلك  
تعود وين مرباط القديم اتقول

\*\*\*

## رسالة إلى أبطال الجنوب التونسي

لوم . وعتاب . وتحفيز من أخواتهم في ليبيا.

سلامي على ارجال الجنوب الثاير  
اللى يشفهم في طرابلس ما صابر

\*\*\*

سلامي على ورغمه  
أهل الولد والبندقه والهمة  
احذاهم رجال طرابلس في غمه  
كل يوم موت وكل يوم قهاير  
الحر ما يخلي للدرك بن عمه  
بين وشعة السداي واللى ناير  
احصاد زرعها ندر على آخر ضمة  
رقد عون تبنه ما بغى يطاير  
على بن يزيد سلامي  
وزيد السواسي وترعة الهمامي  
اجليدات واغبنتن اندز ملامي  
غرارات عكاره انظاف ظماير  
مشوا خوتهم بين لمجار ظوامي  
ما بين بين الغافلين نذاير

وانتم فزعكم قبل عز الحامي  
يردوا على الجار القريب الغاير  
على الموت جانا عقدكم مترامي  
في هجمة الطليان رد العاير  
واليوم هادنتوا على الموظامي  
ولا من تلقي للرصاص الفاير  
وكدر كدايرنا الصديق العامي  
اللى مع العدو هيدن وفات قماير  
\*\*\*

سلامي على الدبابي  
تاريخهم في الوطن ما هو غابي  
وكراشوه للنايبات منابي  
مرازيق في الفزعة دليل الحاير  
احذاهم اصغار المؤمنين مكابي  
جلوا من أوكار الواكرين مطاير  
وحكام تونس قلعوا لطنابي  
وخلوا معشيره عشي للطاير  
وانتم احذا اللى ظالمين مهابي  
عيب الشريف الظالمين يساير  
احنا وطننا راهو عليكم عابي

عليه تفلعوا من الخائنين عجاير  
على اجوار ترعتكم تريس مصابي  
حرم خوتكم تمحوه دور الداير  
وكفوا علينا شرفيه مزابي  
حكامكم للكافرين منابر  
عيب يصبح الجار القريب مخابي  
للعيب وانتم تشبحو ما داير

\*\*\*

## من قصر تيجي

أرسل لي أحد شباب قبيلة الحداده بتيجي يطلب  
مني الرجوع للوطن ويعرض علي الإقامة ببيته . فله  
الشكر والتقدير

من قصر تيجي اعزاز ما نسيونا  
ووين ما يظنوا بالوفا يلقونا

\*\*\*

اعزاز غوالي  
عمارة الفج البعيد الخالي  
اصقورهم مراكزهم اخشوم العالي  
ولا ينزلوا منزل اديار الهونا  
على الوطن يفدوا يلحقوا في التالي  
منين المضايح رونحوا للخونه  
الرجلة معادن ، والتريس ايصالي  
وهكه عرفنا ابيوتهم مفنونه  
سلامك لفي من غادي  
وموش بالمزية اجهادكم واجهادي  
من قبل بيت العز يا حدادي  
اعزاز نفس ما ترموا على المخنونة

وهذي لبلاد ابلادكم وابلادي  
ان كان عانا ربي الكريم بعونه  
نردوا عجاجات لسواو احيادي  
وترجع بفعل ارجالها ممنونه  
أنا ما نرقع في عقاب بيادي  
وننكس البايك كان دخن لونه  
أما انخشها ونعفس على جدادي  
انقابات بعزاز الشرف مقرونة  
ملبوس غالي من جديد مسادي  
كيف ما نصون الصاينين انصونه  
ولا تركنا شبحها للبادي  
والكل من قحَم على كانه  
وأنتم الياطال النهار اسنادي  
وظلعتكم يوم الشرق ميمونه  
ونبعث سلام العز من لبعادي  
على كل حدادي بعث مضمونه  
\*\*\*

## حكاية وطن

أرسل الشيخ والصديق علي الخويلدي قصيده يسأل  
فيها عن انتقالي من الغرب إلى الشرق . ويشكو فيها  
حال الوطن وظروفه الصعبة يقول:

مشراقة الدكتور فيها قصة

عيبي وين كانت شمسنا تتمسي

\*\*\*

كان جارنا من غربه

الياقرب تبدا الباردة بيقريه

احذاه لحداده فوتها وادريه

ايحي النجع متناظر دلال اللسه

من الحوض لا بو الشول يلقي عربيه

من الشط لا خيط الجبل والعسه

\*\*\*

الدكتور قالوا شرق

نسمع كلامه بنشبحه يدرق

قدا نلس في اوجوه التريس اتفرق

تمنع اللاجي وتكرمه وادسه

وفيه من حفر فوسي غريق ايغرق

لين يدفئك موحال تسمع حسه

\*\*\*

بدا جارنا من شرقه  
لاخش لفران لا ليبرقه  
ابناء الوطن ولى خشوشهم بالدرقه  
يا ساق بوشنه عليهم وصى  
وكان حد جاباته قداه الطرقه  
من الموت نحلف لك معاد تخصه  
\*\*\*

مشي قبلها بن دله  
مع سوف ومعاه الصغير وكله  
واحد قعد جاور وواحد ولى  
وها هو خبر لبطل قاعد قصه  
وهجرت ارجال الوطن خلت فله  
وهانا بلاهم نبلعوا في الغصه  
بلاهم غزونا خارجين المله  
بدت قطر في البترول تبغى حصه  
انقل حملنا كان الصحيح ايقله  
الدكتور ويلقط جماعه نصه  
\*\*\*

كان مسكنه غريينا  
وها لوقت يحكولي رحل شرقينا  
معاش نيته فوهران يبغى سينا  
مشي شورنا هذا حديث يخصه  
احنا نطلبوا فارس عطب يحمينا  
من صل جي ليدمنا بيمصه

\*\*\*

باباك يا شراده  
نبغيه يقعد رمز كيف العاده  
فارس بشعره وحكمته وزناده  
يلهد على بارود صادي حسه  
ومن مات ضد الكفر نال شهاده  
تاريخ يقعد دوم راك اتمسه

\*\*\*

## رداً على الشيخ

هذه القصيدة هي رد على الشيخ حفظه الله .  
وأطال عمره مع سلامي لكل المشايخ في المنطقة .  
وسنعود منتصرين بإذن الله . إلى الوطن الذي هو  
أمنية كل الأحرار .

الشيخ دز من وطن لعزاز قصيده  
ترمي مرامي قاصيات بعيده

\*\*\*

ينشد على التشريقه  
من الغرب لقصي من ابلاده فريقه  
وما هو غرضنا البعد والتدريقه  
ولا البعد عل وطن لحرار انريده  
غير حال من عادي الشقيق شقيقه  
المامات بامقابل يموت جبيده  
وولت اخيانات الرفيق رفيقه  
والجار من جاره تكسى عيده  
والشعب ولّى خمسطاش ان سيقه  
اللى يستره مزق استاره بيده  
وحط العدو في كل حوش حريقه  
ويا شيخ يصلوا العارفين شهيده

الحر فارقت ع الخانعين طريقه  
قطع فج ع اللي قاطعين مكيد  
ينزو سرايه اتقول نار طليقه  
يصعب على اللي قاطعه تحديده  
اسمع حديث القصه  
يا شيخ صيص الغرب ما يتقصه  
تركناه للى ينكعوا في قصه  
القينا ازروعه الصايبات حصيده  
اوجوه عل نزازات العرق تتعصى  
ساروطهم ما يصب شور الميده  
وفيه العدو ناصب ميات منصفه  
وشكواك للى سامعين مكيد  
وشرقت والعقال ما تتوصى  
بنلقاش في بعض العرب موفيد  
غير زدت فوق من الغصايص غصفه  
بين ميتة وراقدا احذاه ربيده  
انقيسوا . انقيسوا . نرتجوا في القصه  
القصان مرة ولا قدرت اتعيده  
والشعب تنظيم الصفوف يخصصه  
يحدد أهداف الهدف . واش يريد

ويشمخ على اللي رايژه يتعصى  
ومجد الرجال الغابرين ايعيده  
واش فرق بين الياكلوا في الفصه  
وبين الرجال الصامدين وكيده  
غير الفعايل لا خصص لا خصه  
وتاريخ تروي السامرين تعيده  
يا شيخ ربي يصونك  
وأنا خوك قاعد كيف ظن اظنونك  
بياض وطن بافعالي بياض اسنونك  
وما دام في الخافق نبیض وريده  
وأنا سيد سلمى في المخاطر عونك  
كبار المكايده ما علينا كيده  
في الغرب وين يحد شبح اعيونك  
وفي الشرق فيه نجهزوا تجريده  
يا نمنعوها من وراك ودونك  
يا نسقطوا فيها بلا تلحيده  
وكيف قبل نرفع للسما جبنونك  
وكيف ما تريد الشبر وملاهيده  
ولا يتكى الشايب على مظنونك  
ولا الحاق يمشي للفراغ امنيده

وينهان منهو بالنقيض ايهونك  
الياجوك خوتك صافيه عريده  
ويخلص بسوم الغاليه مرهونك  
وعمرڪ الماضي يرتجع تجديده  
\*\*\*

## أوهام خاطره

اليوم يا حمد خطرت أوهام بعيده  
وزادت على الخاطر اجروح جديده  
خطرت افجوج بعائد  
من البرطمه للوذ لابن قايد  
أوهام عيشونا في زمان سعيد  
وكانت أوطان الواطنين سعيده  
وكنا طرابه بين صيد وصايد  
وكل ما تريده من مصيد اتصيده  
وها لفج ياما قطعوه جوايد  
وقطعه على غير الرجال مكيده  
وخلونا من الماضيين شوايد  
السمار يحكو فخرها تهويده

## جبل المقطم

جبل المقطم يقع وسط القاهرة . اتخذه الإنجليز مخابئ لهم  
في الحرب العالمية الثانية . واستخدموا الأسرى الليبيين لحفر  
الخنادق والمخابئ . والمهاجرون الليبيون اليوم يحيطون بهذا  
الجبل ينتظرون العودة إلى وطنهم .

خشم المقطم حول عل منقاره  
هالصرر خاطر له عفي موكاره  
مل من مركزه  
خشم المقطم موكره ما عازه  
عازم يقطع في سرير نفازه  
ايراوز ودار الوطن بين انظاره  
سرير كيف لون الشندقوره حازه  
دون مرقب الشواط والجراره  
وتو قلقلانه مختبل قرقازه  
يفوح حند قوقه في عقاب نهاره  
وهاكه محله وترعته واملازه  
الياحام منه الذالّه تتواره  
خبير لرض ياخذ غايته ومجاره  
كما دلو خانه الحبلى في محداره  
يكنزّ على خشم لعلي مكنازه  
وكل يوم يصبح يغير مغاره

يشنتل ايفرعس يغلب الحزازة  
لن بالنجيع امحنيات اظفاره  
حول طول اشهوره  
فوق المقطم ناصبه ناظوره  
الياحام على قارون يعمل دوره  
كسير خاطره ما هو طويل مداره  
امرايف على لبرق تعالى قوره  
والتايده اللي جت منه يساره  
واللوذ لقصي والكرب واحدوره  
ومرqb اذياب وقصبته وادياره  
أوكار وطن فيهم شايخه دابوره  
وبرنار يلعن كسبة البرناره  
وهالتاو تجلّي عليه العوره  
وبوعذر ما تنفع معاه عذاره  
يعودوا الصقوره للمكان اصقوره  
والخرب يرجع كيف كان احباره

\*\*\*

## الصويعي

التقيت مع الأستاذ عمر الحامدي في محاضرة .  
وكان ضمن شخوص الحاضرين شخصاً كأنه من  
الصيعان في شبهه . واتفقنا على تسميته بالصويعي .  
وتبين أنه مصري من أصول ليبية قديمة من قبيلة  
البدارنه فأوحى لي بهذه القصيدة :

يا حامدي هبّت ارياح اريافي  
خطرت وخطرها الجديد اللافي  
خطرت أوهام بعيده  
زمان كأنه في الخافقات رصيده  
خاطر خطر نقّظ اجراح جديده  
وولّع سوامر مالمقتشي الطافي  
وفي نجع ع اللى رايزين يكيد  
ما بين عثون النخل والكاف  
نزالي مقار الضيف ومقاصيده  
له يجبدوله النائرات الخافي  
من الحوض لا بشول واماريد  
ويبله عوافي في السرير العافي  
أيو جّب كحيله حوارها تهويده  
ايوقّظ بتوجيه لحزازي غافي

اتعمّر بلا موكر اديار جديده  
اوبرها هذائل فوق من لكتاف  
وتشرب ارياح الظهر للتبريده  
من الوطو تصفّح على لشراف  
كيف الودع عند لمساؤل في يده  
البيض حشوها كانك عليها قافي  
ضجيج سعيهم تسمع افكل هويده  
بين ناير القحوان والزفزاف  
وأولاد بين المصيده والصيده  
اغرام لريللي ودلال لام اشعافي  
من انقيص لا محرت اقرع سعيده  
وغرّب قدا لبرق نسيمه شافي  
وبحرّ قدا قمعون كان اتريده  
وزور الفقيره بالعلام الظافي  
مشاهد ارجال الواكدين وكيده  
في ركنها غياب تحت السافي  
على وطن راموا للثقل صهيده  
بكل فخر طاحوا بالثقل مرافي  
تجلى الغباين لالفوا عريده

ويقسوا العدو لا لاح في لطراف  
وقعدت مشاهدهم اتقول جديده  
عمار ظهرت الجرده الطويل الجافي  
وتاريخ خطه الدهر بتحاديده  
نصايب بقت ترسم اعمار فيافي  
وياحا مدي ما كنت عل ترديده  
الغايب الماضي جبده لوافي  
وما كنت نبغي لغيرنا تجبيده  
وانا وياك عل وطن لعزاز منافي

\*\*\*

## ريم

اتصلت بي إحدى الليبيات المهاجرات رمزت  
لاسمها بـ (ريم) تشكو من الحال . وضيق ذات اليد .  
ومثلها من المهاجرات . والمهاجرين المئات . فإليها  
هذه القصيدة .

لاش نظلّموا الوقت والدهر يا ريم  
وتهديم ركّك اللي كان دافي  
ولومة أيامه الدغوم المجاهيم  
اللي خلّفوا النوم للعين جافي  
اللي سلم الوطن من غير تسليم  
وخلّي اجنابه دوامي مرافي  
وتشتيت شعبه بلا غير تنظيم  
ينجاح ما بين محسن وجافي  
سواوين ظلام وإلاّ مظالم  
سامر رقي في غياب المطافي  
وهاك تايهه في غياب المحاريم  
وميّات كيفك غباهم السافي  
وميّات تحدت المغابي مراديم  
مقايد في احبوسهم بلخافي  
ولا أنلوم ليّام لوم المهازيم  
واحرار يا ريم وطنك غوافي

ما جابهوا بصدق قوم المجاريم  
رضوا بالتناهد تحت الرفاقي  
حيارى على كل شيره مهاهيم  
نيام سبحان نوم العوافي  
خدام هالوقت عند الخدايم  
ولا على كل قهوة مكافي  
وأولادهم في الشوارع مخاريم  
راحوا كما وطنهم للتلافي  
وانتي وميات كيفك معاهيم  
مريضات مش لاقيات المشافي  
الحال يوجع الحال هنن مغايم  
بين الدرك والسجون المنافي  
وهالحال يحتاج وحده وتحزيم  
والنار بالنار في آخر مطافي  
أما رجالك يموتوا مراحييم  
كما موتت المات بوعهد وافي  
ولا يقانوا اغزول المصاريم  
قوادم ايقولها في الخوافي  
بالعز يبنوا لبيوت المهاهيم  
وكل من فعل شي يلقي المكافي

تعودي قدا وطن عز التناعيم  
شريفه ويحموا أطرافك أشراف  
اللى كرامته تنشري بالماليم  
في الوطن كل من يشوفه ايعافي

## مبروكه التواني

أرسلت لي مبروكه بيتاً من الشعر تقول فيه:

رد غربته يرجع ايجي لبلاده

ما يفرحوش بغيبته حساده

فأقول لها:

منك لفي مرسول يا مبروكه

ترك خاطري حلت عليه اشبوكة

\*\*\*

أنا ما تركت ابلادي

وماهنتها لين يفرحوا حسادي

لن دمنافيا جري بدادي

وخانوا مرابعها عبيد الكوكا

ثلاثين دولة فازعة جرادي

هم جو والخيان للهم روكه

ولحرار جردوا رجال عل الجهاد

قريب حول ما هانوا العزيز اتروكه

اشداد عزم راموا للجحيم الصادي

وبان شي للهم بعد طارا استوكه

العالم تكالى الكل من لبعادي

بوطير طابير بوبحر وافلوكه

تركناه وين الشور موش امقادي  
وكثر ت على الراقع اشروك اشروكه  
وولى نصيرك في التراب امعادي  
اقلوب خازنات السو كيف البوكه  
هم حرضوا الشامي على البغدادي  
لين بركوا هللي صعيب ابروكه  
احنى وقت راهوا الفكر منكم غادي  
انوتوا افعده وعقدة التاروكه  
وانسددوا للشادين مسادي  
وحاسبين بحساب المضايح هوكا  
وراس بوك ووراس الرسول الهادي  
انراجوا امراجاة لهلال التوكه  
ستين قمرة ولبلاد اتنادي  
ومو حال تبقى للعدو مملوكه

\*\*\*

## مشاعر عفويه

غثيم راي جابوني قداك اقداري  
ولا قدرت على كثرة خطاك انداري  
قداك جابني مكتوبي  
مقدر وما قادر عليه اهروبي  
القيت في الثنايا السامحات امزوبي  
بعدها عرفت مساربي واشواري  
ووريت لك متغيبات دوري  
وعينت لك مخطر أيام اسفاري  
عليك بعدما ريتك رميت ذنوبي  
وين بات مصبح يبات الساري  
وغيرت من شورك شوب شوببي  
ولودك محيته من ايدين القاري  
محيته لودك  
وحتى هوامش سيرتك واشروذك  
وداويت بالحامي غميق اجرودك  
وذريت تبك للنسوم الواري  
منين درختك بإدراسها مربودك  
ولك طرّحوها للدراس مذاري

وغيرت من ذهني ثنايا مودك  
وبدلت من شورك طريق اشواري  
وشقى الثنايا الصاعبات ابرودك  
وحزيت من نار الشراكه ناري  
ان كان بالخلابص سايلات اسبودك  
أنا النيل عندي في غليله جاري  
وما دام ظلك حابسه مشبودك  
أنا للجبل لقصي شبوح انظاري  
ظهر موج موحى ماتلايم مودك  
ومكري المطية موش كيف الكاري  
وفوت على اللى غافلين اطروذك  
لين يوقظوا وتمشي عشي للظاري  
وفي بحر غليني صعيب اسبودك  
وفوق من اعبار الشايلين اعباري

\*\*\*

## جبل تيركت

إلى الصديق عمر الحامدي

يا حامدي غيب جبل تيركت  
وكيف ما تركنا الغاليين تركت  
راحوا لعزاز شتات  
وراحت بعد مافات فوت الفايث  
طاح فوق ظله كاف تمنوشايت  
ولا فاد فيها كل ما حركت  
ولا القيت في اللي دانين حتايت  
على ما جمال اتقالهم بركت  
وفي ويت مصبح ييات البايث  
وكم من حجاج واكده شركت  
مشت بين بين البانين عمايت  
اقرب يابسه عل كل ما عركت  
وبانت اوجوه الواجهين شمايت  
من ديار بكر الياجبل تمبكت  
وخربت محارث واد تارخصايت  
اليوم وقت لاقصدت لافركت  
وسروس بدي من كل شورفلايت  
وياما على دار الدرك دركت  
وطنك يقضي في الزمان كتايت  
لازرت لارمضاتهم باركت

التهيد ما رد الزمان الفايث  
ونهوا لمكاره ما يجي بالسكت  
وجارك اللى واخذ افكار ابرايت  
ميات قرن تنصح فيه ما فلكت  
ويا حامدي هالوطن راح سبايت  
وتيركت معادت كما تيركت

## رد الشاعر ضو بن راشد الحامدي

يا صاحبي غيب جبل تيركت	وكيف ما تركت الغالين تركت
يا جارنا في الشيره	ويا صاحبي في الجرد والتشميله
اليوم وقت لنا عايشين افحيه	وكيف ما تركت الوطن راني تركت
وطن اللي كنا نعملوا افتطويره	وفي خيانتة ما عمرني شاركت
عليه سيطرت عدة احزاب خطيره	تقطعت أوصاله راح تحت التحت
ولو طان ياقتباط زي الصيره	لكاك نبشت اقسامها وحركت

ضو بن راشد الحوامد

## يا ليبييا ....

يا مصعّره خد الصغي للحيف	ما كيف كيفك كيف
بعد نزلوا دارك اديار الهون	صرتي على المطريف
يا عز يا قطب الرحى للكون	يا طيف طيف الطيف
شوقك اللي مكنون في المكنون	كيف صهد نار الصيف
يا نار يوم العرك بالمسنون	يا عز دار الضيف
وما كيف لونك في البرية لون	غنيه على التعريف
بقانونهم وإلا بلا قانون	صعبة على التكليف
وفوق المجره الراس والجنون	فوق السحاب النيف
وتاريخ تاريخك صفا ممنون	عرضك نظيف نظيف
ولا يندفع عل خاطرک عربون	عصيه على التصريف
للخير عون ولللاجي عون	رجالک حماة السيف
فوق فوق فوق فوق ما هو دون	شرفک على التشريف

انتني خارج التصنيف  
بعيده على التحديف  
انصابك اليوم نزييف  
لابد من التكيف  
اولادك ضعيف ضعيف  
وحمل الرجال خفيف  
أحفاد من منى والخيف  
هوايف على التديف  
بحر العصيف عصيف  
زفيف في عقاب زفيف  
ويقطعوا التكتيف  
معاه الكلام قصيف  
اتغيثك امزان خريف

وفوق ظن من ظن الكمال اظنون  
وراسك على طولانهم مصيون  
ودمك على قاع التراب اسخون  
ولابد اجرادك بالشفاء والصون  
يشيلوك شيل معالف الميدون  
ولا يخضعوا لبرنار لايون  
يثوروا كما الثورات في الكبسون  
ولا يتكي الشايب عل المضنون  
كما رد في التاريخ بوظليون  
كبير زحف كيف السيل والدييون  
احرار لصل ويهدوا كما الغيدون  
هم ولمعادي النار والكربون  
افكل غوط يتماوج البوقرعون

واللربيانه نورها مفتون	واشـقار والنكرـيف
يفوح عطر بين الشيخ والبابون	والحنـدقوق كـثـيف
والقحوانه وحوذلان امحون	ولسـلس اتقـول شـليف
فيه لحوار اتقول ولد لبون	والقـود بـالتعطيف
كل من تكولف سيرته بالهون	ويلبـد يـخـش الـليف
ولا يفيد فعل الخير في القمعون	ما ينفـع التـطـيف
ولحرار عل قصعة السرج تكون	يعود الـرديـف رديـف
ويا ويل منهو لليبيا مديون	وكل شي بالتـسـليف

\*\*\*

## إلى بعاد الدار

بعدتو بالترعة يا ناس ... بغير قياس.. سقيتونا كاس ورا كاس

\*\*\*

بعدتوا وحازتكم لبعاد	ضاحضح اتغيم وافجوج
رقاق كيف النيله يسواد	ثنايه على خاطر عوج
محفي حصاصه ورشاد	خالي من حثر الديجوج
ومجدب من شدة لصهاد	عجابه يرقى كيف الموج
اجبال توحش واغراد اغراد	ولا فيها لـوآج يلـوج
حايـزكم دون المقصاد	ورحنا هيـجوج وميجوج
بدت ذكراكم في الميعاد	اتهبط في القلب المهيجوج
وفاهقكم ماله سداد	يبات يحلب كيف المخلوج
ولا منكم جانا نشاد	قصود وجلس
	امّاجع في خاطر تحبلس

## كيف يكون عيد

يا عيد كيف يكون عيد بلاهم

اعزاز لين ننسى الروح ما  
ننسىهم

\*\*\*

كيف اتجينا

واتطل بهالك جديد علينا

يا عيد ضيقت الحاضرة بينا

على اعزاز مسخ الملسخه جلاهم

الموح طال كيف الجالين جلينا

وغيب نبانا منين غاب نباهم

وما نش كيف الجافيين جفينا

بعاد دار ميعاد لخلق اعماهم

يا عيد تارك في الخواطر نينا  
ودردر خواطرنا اخباث انياهم  
بدى ريح حفاة لبلاد عطينا  
يوسن اللي يخطم قريب احذاهم  
انصفوا صفاهم كائنا ولينا  
بناتيلهم نرجب على تذراهم  
ويا عيد هانا فيك كيف رقيننا  
أنصار العدو منا قليل نجاهم  
عيد الأضحى (٢٠١٦م) .

## أوهام .....

أوهام خطرت جابت أفكار جديدة

ورقت كما لمزان في التهويده

أوهام شورها متعادي

ومتراكبه ما بين جاي وغادي

اتقول طلح والقندول حشو اوسادي

امغونن جلب حزمة أفكار بعيدة

ولا شور بين المشورات امقادي

ولا من نصوح يجيب لك موفيده

كم من عدو عاداك عل لبعادي

يرميك كانا قد باللى فيده

صديق أمس يتخوطم عليك احيادي

وقصّر على طول الخطاوي قيده

وتسمع تشريده على لشهاد

## كل يوم ينشر في الخبر جاريده

ولا تنزع ما دام عونك هادي

## تو بیترم ینصاع کیف تریده

## ويبدو قداك الشاردات هوادي

**وتترع بعد طول الفراغ الميده**

## أوهام بعائيد

## ما قدعوها قادات حدايد

## ما يجب الغرغاز حبل الباي

**وما يجيك من لى امعاديين وديده**

## یغیس حمل من رافع بغیر رفاید

## ويطيح ناظورك بغير سنيده

الخير ليه عند العايدات عوايد  
والشر عند الشارين حصيده  
يكيدك اللى ناويه كان اتكايد  
وتقصر على اللى في الضمير  
اتريده  
وما يفيد في اللى جافلين وعايد  
العاقل خناتيب الظلام اتكيده  
وخليك من لي واخذين شهايد  
افباب الطمع عبادة المرميده  
ايجوا للقفوف الماليات عرايد  
ويسابقوا شور الطمع عريده  
ولا تدوم في الدايم أيام زهايد  
وكم قبل ما مرت أيام زهيده

أيام كيف كف الجايدات جوايد  
ما تحيد لو تبغيها تحيده  
وأيام تمشي ما عليها شايد  
قصيفات في لون لغراب فريده  
والصبر يبيري من اجروح كمايد  
يشفيك شافيها بلاش ضميده  
وكثر التمني للعواقل زايد  
غير كدر للعقل الرزين يزيده

٢٠١٧/٦ /٢

\*\*\*

## الفهرس

٣	الإهداء.....
٤	ربيع الهروج.....
٦	إلى حسن القادري.....
٨	رثاء.....
١١	رد على رد.....
١٣	ليلة العيد.....
١٧	الصوم على الوطن.....
١٩	سرير التميمي.....
٢٢	الصبر.....
٢٥	أجراح جرحه.....
٢٧	أنور محسن زهيو.....
٢٩	الصقر العنيد.....
٣٠	إلى أخي الذئب.....
٣٣	يا بن شعير.....
٣٦	يا بيض الشعاف.....
٣٧	حكومة فيشي.....
٣٨	قلب مهموم.....
٤٢	هذه القصيدة.....
٤٦	صحراء الوطن.....
٥٢	(يا ليبيا).....
٥٥	إلى سيدي رسول الله.....
٥٧	وما أدراك ما الغدر.....
٥٩	رسالة إلى أبطال الجنوب التونسي.....
٦٢	من قصر تيجي.....

٦٤	حكاية وطن
٦٧	ردًا على الشيخ
٧١	أوهام خاطره
٧٢	جبل المقطم
٧٤	الصويعي
٧٧	ريم
٨٠	مبروكه التواني
٨٢	مشاعر عفويه
٨٤	جبل تبركت
٨٦	رد الشاعر ضو بن راشد الحامدي
٨٧	يا ليبيا
٩٠	إلى بعاد الدار
٩١	كيف يكون عيد
٩٣	أوهام
٩٧	الفهرس